

隨

園

全

集

詩

卷

隨園全集之三

小倉山房詩集

桐園署



中華民國十年
上海商務印書
局總發行所

序

爾雅疏云序者序述此經之旨也隨園先生論詩之旨一見於集中答歸愚宗伯書再見於續詩品三十二首凡古人所未道者業已自道之無俟再爲序述第按其所編始弱冠終花甲四十年之行藏交際具在於斯可當康成年表讀矣晚年境愈高才愈斂欲刪去少年落花殘雪諸作起鳳爭曰孤松蒼於冬時花繁於春各有其時不可廢也先生曰諾已乃並存之橫山弟子薛起鳳序

讀隨園詩題辭

我讀隨園詩古多作者我不知古今只此筆數枝怪哉公以一手持意所欲到筆注之筆所未到意孳孳好風搖曳春雲姿雷雨捲空分疾遲神仙龍虎雜怒嬉幽禽古木山四圍水光澹澹花垂垂境界起滅微乎微難達之情息息吹難狀之景歷歷追我忽歡喜忽傷悲忽叫忽躍忽嗟咨口權目量心是非我身傀儡詩牽絲問我不知旁人疑如沐酥酪潤膚肌如飲醢醢沁肝脾如禮杖拂迴愚癡如受砭刺起癰疲海嶽幽奧林泉奇氣象入筆皆可窺高才博學嚴矩規心兵意匠極艱危歸諸自然出淋漓公曰我詩無常師取長棄短各有宜傾瀝精液擲毛皮取友求益吾無私先生天才重倫彙至情感人皆涕洟每值死生當別離由片言至千萬詞不少不多相授施魂銷腸斷噫戲欽聖賢萬古情若斯否則其言傳者希我詩感公加鍼錐凡我所短攻弗遺剛濟以柔戒恣睢裁縮鍛鍊歸鑪錘請事斯語曷敢違公懼弗傳誰庶幾索報懇懇命點嗤壯健無疾求良醫調和血氣慎葆著敢妄攻補促疳羸卅載所作手芟夷美人對鏡修容儀釵裙佩帶生光輝玉工懷璧精磨治白圭瑩潔除瑕疵淺深

功力年可推江河發源無所虧及放四海甯竭衰況公遺榮樂巖扉忠孝所溢詩書滋後進
我幸生同時願寫副本藏巖屋千秋歲月堂堂馳讀公詩者如何思館後學蔣士銓題

讀隨園詩題辭

其人與筆兩風流紅粉青山伴白頭作宦不曾逾十載及身早自定千秋羣兒漫撼蟬蜩樹
此老能翻鸚鵡洲相對不禁慚飯顆杜陵詩句只牢愁

舒卷閒雲在絳霄平生出處亦超超曾遊閬苑輕三島愛住金陵爲六朝富貴豈如閒有味
聰明也要福能消不須伯道愁無子此集人間已不祧

只擬才華艷誰知鍛鍊深殺人無寸鐵惜墨抵兼金古鬼忽然泣生龍不可擒挑燈重相對
想見妙明心

館後學趙翼題

讀隨園詩題辭

憶自數歲入鄉校卽聞世有才子姓袁字子才漢廷峙揚馬梁園艷鄒枚斯人一出文選廢
蕭統若在須別裁比長游都下結交海內英益得才翁之才與其行二十作文賦徵在鴻儒
班一舉擢高第供奉玉皇前每出一篇奏已被中外萬口傳若非河滿張承吉卽是洞簫
王子淵鸚羽苦羈縛三載辭金殿驥足稍欲施四任宰江縣江左形勝天下偉古來名士
此中半臨江酬酒弔桓王開國英雄同弱冠三十未及強拂衣賦歸歟金陵有遺愛遂僦金
陵居犀首不好飲虞卿還著書燕許兩禿翁鞠躰斂手謝不如更以其暇劇奇石選妙妓闢
華軒跌宕詞賦闌咽管絃遂使當代鉅公貴人下逮傭豎併婦孺無不知大江以南有隨園

喬也陋已極未及身作隨園客一官投嶺嶠所見生獐語啾啾或傳才翁名謂是古人今莫得忽驚將軍自天下如郭令公出回紇中丞爲予言子才詩中霸子往試與語庶免爲驅嚇碧虛洞與棲霞連一見握手如舊歡自言行年七十走萬里相得無如吾子賢朝遊共躡白雲屨夕歸同泛明月船岸人笑謔爭指似采石江上看謫仙我詩槎枒多苦語誰其好之茹不吐才翁一呼四座驚此至誠通愈及甫比疎詎所當交驚亦差樂平明來取別將往觀衡嶽中路寄我詩已據衡嶽之磅礴噫嘻戲才翁之才如天風人籟雖工那得同惟有隨園歎未到要使姓名先署隨園中

隨園詩贊

曠矣先生侔今無徒儕古少類達如劉伯倫而不好飲逸如稽叔夜而不好音樂習靜如玉摩詰而不好佛恬退如賀季眞而不好道以名教是非自任如韓退之而不好儒志鄙王戎而不諱好財性異阮咸而不辭好色詼奇俶儻疑龍疑蛇播之爲文天燄地葩或謂是太白之精所化而爲文章之宗耶或謂是歲星所寓而爲滑稽之雄耶吾莫能測之而盡其形容也

後學李憲喬題

小倉山房詩集總目

第一卷

古今體詩五十二首

第二卷

古今體詩五十四首

第三卷

古今體詩九十八首

第四卷

古今體詩八十四首

第五卷

古今體詩一百二首

第六卷

古今體詩七十二首

第七卷

古今體詩九十首

第八卷

古今體詩一百四十九首

第九卷

古今體詩七十二首

第十卷

古今體詩一百二十五首

第十一卷

古今體詩九十四首

第十二卷

古今體詩三十一首

第十三卷

古今體詩一百二首

第十四卷

古今體詩七十二首

第十五卷

古今體詩一百五十二首

第十六卷

古今體詩一百二首

第十七卷

古今體詩一百三十三首

第十八卷

古今體詩五十六首

第十九卷

古今體詩九十二首

第二十卷

古今體詩一百三十五首

第二十一卷

古今體詩七十首

第二十二卷

古今體詩六十一首

第二十三卷

古今體詩七十九首

第二十四卷

古今體詩一百二十首

第二十五卷

古今體詩一百九十首

第二十六卷

古今體詩二百七首

第二十七卷

古今體詩一百十八首

第二十八卷

古今體詩二百十九首

第二十九卷

古今體詩一百一首

第三十卷

古今體詩二百三十四首

第三十一卷

古今體詩一百三十七首

第三十二卷

古今體詩一百八十七首

第三十三卷

古今體詩一百首

第三十四卷

古今體詩一百三十二首

第三十五卷

古今體詩五十八首

第三十六卷

古今體詩二百二十五首

小倉山房詩集卷一 丙辰丁巳

錢唐袁枚子才

錢唐江懷古

江上錢王舊蹟多我來重唱百年歌勸王妙選三千弩不射江潮射汴河

釣臺

夜泊釣臺旁客星如月大想見嚴子陵投竿在此坐朝隨漁翁嬉暮陪至尊臥爲念故人重轉覺天子輕偶展榻上足乃驚天上星

書子陵祠堂

士各有志在投贈須良時乃欲臣老子張眼發狂癡巢由効孤忠唐堯何能知當時西漢衰士氣一何卑四十二萬人尊莽稱巍巍先生隱蘆中惻然心腸悲故人作天子臣請爲伯夷甘與子同夢伸腳踏紫微贈子以不拜王丹吐微詞將軍有揖容衛青賢可思何況赤伏符可無王者師雲臺麟鳳旁漁者張一旗果然東漢風名節爭扶持相助爲理處於後乃見之我留壁間墨當贈先生詩

辟昭諫墓

遠望羃江氣寂寥江東遺塚草蕭蕭三生金榜無名字一卷唐詩殿本朝照壁紅紗曾志寵隔簾嬌女罷吹簫傷心枉進英雄計花醉華堂淚未消

臨安懷古

曾把江潮當敵攻三千强弩水聲中霸才越國追勾踐家法河西倣寶融宰樹重重封錦繡

宮花緩緩送春風誰知苦創東周局留與平王避犬戎

吳桓王廟

擲戟神亭一笑分英雄名號尙郎君南來劍奪中原色獵罷龍驚草上雲自覺風流夸二壻
有誰旗鼓鬪三軍千年願獻饒歌曲帳下還愁子布聞

琵琶亭

孤亭月落九江秋彈過琵琶水尙愁今日蘆花笑詞客不曾老大已飄流

謝太傅祠

一笑翩然載酒行東山女妓亦蒼生能支江左偏安局難遣中年以後情花下殘碁兒破敵
燈前老淚客彈箏荒祠隔葉黃鸝語猶似當初絲竹聲

夜渡彭蠡風浪大作

半夜顛風欺客過奪取孤舟當箕簸桅折羣驚大蠹崩燈昏不辨何艚破騎虎由來勢莫停
駕鰲且向西南征滿眼黃泉不見路咭喲但聞龍蛇聲青蘆颯颯濤而止長老大呼吾生矣
拍拍羣鷗扶浪起彼此相看面如紙衣裳都付宓妃洗一身之外水而已編詩不編前甲子
墮地重生從此始

野行

野行逐流水花裏得茅廬中有龐眉叟旁堆數卷書衣冠非漢魏妻子半樵漁拱手詢名姓
無言指太虛

看山

看山有所得日暮聊爲詩舟子多曳足村歌以答之江湖發天籟秋光亦平分我歌船頭月
爾歌船尾雲

浯溪碑

夷吾雖歸辱社稷射姑來朝無貶詞從曰撫軍守監國古來冢嗣良如斯宋儒不明春秋義
題浯溪碑多刺譏當時明皇躍馬去五更昏黑西川馳若非靈武張位號九州不見天皇旗
望賢宮前重返蹕黃袍手著如嬰兒一辭一畀見眞性此際慈孝天皆知玉眞公主具尊酒
上皇父老相娛嬉監奴攬權艷妻惑從此兩宮生猜疑君子原情論大義事有後累無前非
魯公忠孝立人極金石腕力尤淋漓先拜新君心抃舞後望南內空淒其書罷大唐中興一
頌刻山石再書朝上皇一表鋪丹墀

長沙謁賈誼祠

江口瞻遺廟長沙最少年才雖王者佐運是漢家天屈子堪同調相如敢比肩虛無宣室問
卑濕楚江遷道大功臣忌心孤鵬鳥憐三湘知數盡七國悟機先飄泊傷靈化穠華委逝川
綠蘿蟠敗壁飢鼠拱殘筵神鬼眞無狀風雲合有緣長懷夫子哲轉憶孝文賢遇合終如此
功名更惘然我來剛弱冠流涕返吳船

巴陵道中

洞庭西去女郎祠來慰行人有畫眉山縣城荒關店早戍樓燈遠泊船遲方言莫辨思重譯
異鳥無名愧學詩難得篙工解人意每開牕處對花枝

旅懷

欲采芙蓉贈楚狂，幾番漁笛聽滄浪。洞庭霜淺橘全綠，湘浦雨深荷暗香。行色喜逢秋八月，家書孤負鴈千行。無端側耳隣船泊，有个人音似故鄉。

書倉頡廟

黃帝上天不識字，玉皇大笑人間俗。特遣倉公來造作，電光熒熒開四目。遠采龍魚篆，近取蝌蚪行。一畫生枝葉，六書加偏旁。可以記名姓，通九州。三才萬象相咨諏，天公賜粟萬萬石。厥功猶未酬，千鬼何事哭啾啾。上古無黎邱，疑是三王五帝之靈爽。相悲愁，倉公不知故賤子。請致詞行公之道，享公福。古今惟有尼山師，與公初意無相違。其餘竄經冒聖紛紛者，坑之不足蔽其辜。而乃辟睨兩廡，犧牲乎摩騰。借此來中華，侏僂梵偈盈百車。學仙誤仙書，白骨如撐麻。此外深文刀筆萬萬條，張湯趙禹日喧譁。官禮亡新室，血流誣武王。元凶講孝經，妖僧造明堂。董侯強解事，皇羲五十章。穿鎚大將軍，腕脫校書郎。蠹魚食盡三萬字，上天不如蜻蜒翔。腐儒識之無公然，搔首怨彼蒼。我自與公有瓜葛，亦復呬唔如蚊蟲。不能腰鑱田中騎，馬沙場三升墨水非瓊漿。他日餓死分所當，故鬼哭未已。新鬼淚沾裳，功過不相掩。請公自思量，公如肯補過，請公南面坐。周公右，孔公左。始皇在旁，手把火，刪除六經質。諸聖黜陟百家來，問我朝不必多書野，不必多儒拔鬼一毛利。天下欽明文思追，唐虞再拜奠椒酒。臣言是與否，倉公領之不開口。但見神鴉鬼馬雲中各點首。

萍鄉紀事

遠望碧桃盛，不知何家村。停舟牽裳往，頗聞書聲喧。柴門數學子，列坐何彬彬。聞有江南客，欣然喜動顏。各將文章來，願聞所未聞。爲之小講解，圍坐點頭頻。歸各具雞黍，手自擎瓦尊。

父兄荷鋤歸亦來覘佳賓但勸客小住不知天黃昏我乃行役者風中不定身告以勢難留
紛然淚滿巾攀衣送登船姓名僉云云後會知難期前途君自珍感茲醅樸意如逢羲軒民
方知古桃源依然在人間但恨無緣留回頭空白雲

同金十一沛恩遊棲霞寺望桂林諸山

奇山不入中原界走入窮邊才逞怪桂林天小青山大山山都立青天外我來六月遊棲霞
天風拂面吹霜花一輪白日忽不見高空都被芙蓉遮山腰有洞五里許秉火直入衝烏鴉
怪石成形千百種見人欲動爭鎗鏘萬古不知風雨色一羣仙鼠依爲家出穴登高望衆山
茫茫雲海墜眼前疑是盤古死後不肯化頭目手足骨節相鉤連又疑女媧氏一日七十有
二變青紅隱現隨雲煙蚩尤噴妖霧尸羅袒右肩猛士植竿髮鬼母戲青蓮我知混沌以前
乾坤毀水沙激盪風輪顛山川人物鎔在一爐內精靈騰蹕有萬千彼此游戲相愛憐忽然
剛風一吹化爲石清氣旣散濁氣堅至今欲活不得欲去不能只得奇形詭狀蹲人間不然
造化縱有千手眼亦難一一施雕鐫而况唐突眞宰豈無罪何以耿耿羣飛欲刺天金臺公
子酌我酒聽我狂言呼否否更指奇峯印證之出入白雲亂招手幾陣南風吹落日騎馬同
歸醉兀兀我本天涯萬里人愁心忽挂西斜月

薦鴻詞北上辭別桂林中丞

萬里投知己千秋見偉人掃門才授贊倒屣已迎賓弱冠終軍小憐才鮑叔眞牛心先賜啖
馬骨倍精神一卷文章獻千回諷誦頻百僚參謁處入座散衙辰譽我如夸寶寶母字以文珍
人聲齊諾諾公口尙津津詔舉通經士慚非珥筆臣毅然標姓氏直自奏 楓宸計吏爭供

具材官盡捧輪辦裝錢絡繹祖餞酒溫醕石重鰲難戴風高草易春未開花獨賞久屈蟻應
伸多感雲霞契能增骨肉親窮途來阮籍有叔愛蘇秦叔健磐以公桂嶺三秋月長安一路
塵拜辭先洒淚圖報屢看身夫子宮墻遠男兒事業新遙聞西域國獨角貢麒麟

別常甯 叔家青衣

六千里外一奴星送我依依遠出城知己那須分貴賤窮途容易感心情灞江此後何年到
別淚臨歧爲汝傾但聽郎君消息好早持僮約赴神京

黃鶴樓

萬里青天月三更黃鶴樓湘簾才手捲漢水拍天流山影如爭渡漁歌半入秋深宵無鐵笛
空自泊孤舟

過洞庭

秋老一峯晴巴船過洞庭水搖天地白山入混茫青雲氣飛篷背霜花落鴈翎今朝吟不得
牕外有龍聽

題柳毅祠

風鬟雨帶藕絲裙素手傳箋寄暮雲世上女兒多誤嫁諸龍休惱洞庭君

漢江遇風

風急蒲帆葉葉張蘆花飛雪打瀟湘似盛漢水湖猶小欲上君山浪太狂行役自來多涉險
少年何事便離鄉黃昏漸喜驚濤定遠遠漁歌唱夕陽

途中見薦章感而有作